

Memorabilia: la segoira Benino, un curandiru curiusu, un pirru con memoria..., y otras cusadietsas de Casorvía

Por Rufino Ceferino Vallejo.
Casorvía

En sin tratar de paiceme a Xenofonte, nin na so fastera de militar, porque el mio “ardor guerrero”, al dicer de Muñoz Molina, escosóse nel Ferral; nin na so d'escritor, perque cola pequena Apologia de Sócrates, ya tien bramente pa ser ún de los importantes, voy a esmesar del quentu la memoria algo que podríamos tsamar memoria histórica; porque escúrroque tamién ye acordase de xente y casos que pasaron en Casorvía nun va tanto: primero, porque, si nun los escaicemos, nun morrerán del too; y, segundo, pa ver cómo yera la vida fay bien poco. Vamos, pues, a falar de personas y casos.

Xusticia

José la Fuente nacería sobre'l 1870 y tantos; yera primu mio güilu y hermenu Angela, Donato, Amador y la madre d'Isaz el de Tsinares. Trabayó munchos años nel Norte abriendo vía, y, na más que escurecía, andaba col farol hasta cuando diba a poblar pa La Figar y Malveo.

Van años pasó una aición que merez la pena nun escaicetsa, pa ver cómo yera la xente vieyo, y que'l nun enfotase na xusticia nun ye d'agora.

Resulta que un día, daquién vu pasar unas caballerías arreás per xente desconocío; paicieron-y de José la Fuente, y dio cuenta; nun sé cómo, los guardias de Campumanes tsaron mano a los tsadrones y mandaron recaó al tíu José pa que baxara a ver si las caballerías yeran las sós.

- ¿Cómo nun diba conocetsas? - ¡Claro que son los míos! Dixo.

Los guardias comentaron que zarrarían nel calabuzu a aquetsa xente, y más terde faríase el xuiciu pa ver lo que determinaba el xuez, y empunxeron al tíu José camín de Casorvía.

Al tíu José nun-y paizú na bien l'asuntu, asina que golvúse y dixo-ys:

- “Na de calabozos nin xuicios; dexaime pasar, que ya-ys apurriré yo unas bonas guiadás”.

Un curandiru curiusu

Aniceto figura n'esta páxina como curandiru, y ye una gran verdá, polo menos pa mí, y voy cuntavos por mor de qué.

Siendo yo guaje, tendría 9 ó 10 años, mandáronme a Remuñuz a tsar la vacas fuera; primero tenía que xubir al payar, esmesar, tsar la yerba abaxo, ... Resulta que un xebetu taba podre, y rompí al pisar, de moo que metí la pata y, a l'agarrame pa nun tsevar una xostrá na cuadra, desigualé una mano. Vime nigrú pa salir del payar pel bocarón, pa soltar los cotsares, ratsar, saca'l cutso y tornar pa casa; tenía que parame a ca poco, como si lo que tuviera desigualao fuera una pata. En tsegando, mio madre dixo: “hay

que tseivate a que te vea Aniceto”. Y dicho y fecho, colamos pal Paso, cruzamos la vía, seguro que taba Maria de guardesa, y entramos en ca Aniceto.

Miróme la mano y dixo; “nun ye na, ninu, pero hay que iguala”. Y yo, tan contintu; nun sabía la que me tenía prepará. Cató una escudietsa con un poco aceite y emprincipió a sobame la mano; los autsios debían oyese desde Irías, pero al retu paró de sobar, encanome fuerte la mano y dixo-y a mio madre: “que nun enrede n'una semana”. Pasó la semana, quité l'enquenu y hasta güey; nun golví a tener ningún dolor.

Los xóvenes preguntaréis-vos:

- ¿Cómo nun te tsevaron al médico? ¡Ay, al médico!

Primero, nun había carretera; segundo, el médico la Renfe taba en Fierros; tercero, ¿quién diba a tsevame?, bueno, pa qué seguir, si yera un quesu de poco. Y lo último y principal, teníamos a Aniceto, que pa asuntu de güesos y esas cosas, nun había igual, nin médicos nin médicas.

La segaora Benino

Los inventos fueron tsegando a Casorvia muy poco a poco. Primero, oyíase que daquién ha visto hacia Uvieto una máquina que segaba ,y nel tsiyre ya teníamos lío;

- eso nun pué ser; ¿Cómo va a poder mover el gaeñu y andar a la vez una máquina?;

- que sí, que vila funcionar n'un preu, y andaba un home escalzonéu tres d'etsa.

Las voces sentianse desde ente la escuela, y la discusión volvía a apaicer ca poco.

Tiimpu después diban viéndose hacia La Pola, y, como la xente ya baxaba al mercao, convencíanse de que haber habíalas. Agora la discusión yera per una custión técnica; los argumentos en contra yeran dos: el primiru, que la máquina dexaba dos o tres centímetros en sin segar, vamos, que nun apertaba el coción; el segundu que nun podía desaverar y entóncenes las xebes tsegarian al medio'l preu.

El dir catar la gasolina a La Pola ya yera una custión en sin importancia, comparao colo difícil que sería tsevala per algunos caminos. Tamién daban por descontaio que, pe los sotambios y xarrapatales, nun podía funcionar. Había partidarios, porque, según decían, segaba n'una hora lo que un segaor n'un día y eso ya nun tenía discusión.

L'engarradietsa desapaizú cuando Benino trexo una. Foi hacia mediaos de los 60, y los guajes ranábamos per vela furrular. Un día, a la terde, sentimos el motor y, en menos de ná, tábamos tolos guajes del tsugar tres d'etsa. Benino xubía desde so casa pal Carbeyo, y n'un retu segó t'ul preu. Que si nun desavera, que si lo dexa alto, que si gasta gasolina ..., pero los guajes quedemos convencíos que yera un gran invento, y así foi. Poco detrás compró otra el tío Luís; y después, Milio, Pepe, Gafo y otros.

Menos mal que los que decían que las xebes diban a tsegar al medio'l preu agora ya nun lo puen ver, pero ye asina, y la culpa nun ye de las segaoras.

Qui aures audiendi, audiat ...

Y pa que toos me entiendan: el que tenga oreyas pa oyer, que atienda.

Fay como 60 y tantos años, n'una inverná, mandóme mio madre dir a sacar las vacas a l'agua a Remuñuz, hincher los preseltes, sacar el cutxo ..., bueno, lo de siempre, a poblar.

Tsegué al preu, y el pirru, el Choto, emprincipió a ponese un poco reru, oriscu nun ye la palabra. Tsuiu sabréis por qué.

A la manga la derecha, a la vera'l camín que vaxa de Congostinas a Renueva, per cima Barbieca, taban seis o ocho oveyas que nun yeran nuestras, pastiendo a sos deleres; nevaba como cuando yéramos guajes.

Dixe-y al pirru: ¡Échalas! Y el pirru, dicho y fecho: coló esmanéu pa baxo a facer quesu. Munchas golvieron pa riba, pa Naveo, pero una metúse na mata, tres d'una caborna; golví a manda-y, y el pirru coló tres d'etsa, pero paicería-ys que correr pa riba yera peor, así que saltaron al camín y colaron, camín a baxo.

Yo, venga encamentar al pirru: ¡Choto, ven, Choto, ven! Pero, nin quesu. Corrí tres del per tul camín, hasta'l quentu baxo l'Arquera; pero ya taban tsegando a la cueva Tsadreo; pasaron per baxo la vía, porque el puente habían tapáolu diban unos años, y tiraron pa Renueva. Al ratiquín el pirru paizúseme a la vera, pero de la oveya nin restru.

Tsorando, golví pa casa pente la nieve, pero nun dixé na; ¡catáronme!

Una oveya trespandá

– Falta de Naveo una oveya de Pepe. ¿Serían los tsobos?

Y yo surdu, como si ná; esperando a que escamplara.

A los dos o tres días tsegó mio padre de trabayar de Soto Rey.

– Dixó Bautista, el d'Heros, que tenía una oveya, trespandá, que paecía, vete a saber por qué, de Casorvía. ¿Sabéis algo?

Y yo, como un escorpín, zarréu, en sin cantar.

– Será la oveya Pepe.

– ¿Cómo diría a parar a Heros?

– ¿Sabes algo, Ferino?

Y yo catsando, tanto que hasta güey nun lo supo naide.

Y poco a poco, sele, las cosas golvieron al so ser; Bautista, o Segundo, mandaron avisu, y la oveya golví a Casorvía.

Si la aición tsega a ser agora, preséntanse los guardias, los del xuzgao, los rexiores, algún aboguéu ... pero la oveya en sin paicer.

Un pirru con memoria

El pirru, el Choto, yera de Pepe, el mio primu segundu, pero yera yo el que enredaba con él. En setiembre colé pal colexo y nun golví hasta últimos

Rufino Ceferino Vallejo

de xunu, sobre'l 24. Tsegué a Fierros nel exprés de la mañana y xubúme Trobo hasta'l Paso, na gresina (tengo entendío que se diz dresina), entsurdiéu nel medio, ente los cables, porque yera la gresina antigua que tenía muy pucu sitiú pala xente.

Entóncenes vivíamos en So la Ilesia. En tsegando pregunté pol pirru, y mio madre díxome que taría con Pepe, que andaba segando pal Puzu l'Éguila. Sali a l'antoxana y pegué un xiblú. Nun pasaron dos minutos, y ya taba'l pirru tsadrando y xingando'l reu a la puerta casa. Fixaivos si me conocería.

Otras crónicas de Casorvía, por [Rufino Ceferino Vallejo](#)

Volver a www.xuliocs.com